



Duzdouq Daej Lo

□ Mungz Ningz / 蒙 宁

Gaxgonq, lwgda duzdouq mbouj lumj binghda baenzneix hoengzfwgfwg, dujrwz hix mbouj raez, naengbak hix dwg baihgwnz baihlaj song limq. Engq dwggayez dwg, de lij miz diuz rieng hung bwnnyumnyum lumj noucoengz. Duzdouq gig vih swheij baenzneix gyaundeix daekeiq fwngfwng, lij ciengzseiz yawjsiuj bouxwnq dem.

Miz ngoenz ndeu, duzdouq okdou bae guhcaemz, gvaq aen ranzyawjbingh duzmou canghyw, de doq dopfwngz doq ciengq go hwnjdauj: “Mou rieng iq, mou rieng iq, diuz rieng iqet dinj youh ndoq.”

Duzmou canghyw baez nyi couh huj ndaej gyangz baez ndeu, couh mbouj leix duzdouq.

Duzdouq youq gwnz loh bungz daengz duzma daeggo soengq saenq, couh youh riu dwk ciengq: “Duzma bak soemset, duzma bak soemset,

bak soemsetset henx gaiq ndok.”

Duzma daeggo cingq muengz dwk, caengz duzdouq da ndeu, couh mbouj leix de.

Duzdouq couh engq daekeiq lo. De youh buet haeuj ndaw bouq-nienjhaeux bae, diuq hwnj gij nienjrin duzlawz daxgoeng cingq rag haenx, daihsing ciengq: “Duzlawz rwz raezrang, duzlawz rwz raezrang, duj rwz raezrang song mienh geiz.”

Duzdouq cingq ciengq dwk, mbouj haeujsim couh daj gwnz nienj conj roengzdaeuj, deng aennienj daenz raek diuz rieng hung. Dujrwz deng gaz youq gwnz dauq nienj, deng rag ndaej raezrang. Ceiq youqgaenj dwg naengbak byoengq lo, dek baenz sam limq!

Duzlawz daxgoeng cingq laep lwgda haeujsim rag nienj, dingqnyi duzdouq hemq, doq dingz roengz-daeuj. Duzlawz daxgoeng doq rex duzdouq, doq hemq vunz daeuj

bangfwngz. Seizneix duzma daeggo cingq soengq saenq gvaq gizneix, couh buet bae heuh duzmou canghyw daeuj.

Duzma daeggo gig vaiq couh daengz ranzyawjbingh duzmou canghyw. Duzmou canghyw ganj daeuj bang duzdouq duk gizsieng. Duzdouq gwq daej lo, lwgda couh bienq ndaej hoengzgywgywg lo. Daej swheij cabheiq, loengh baenz gij yienghceij yakyawj neix.

De nyinhnaeuz swheij mbouj wnggai riu duzmou canghyw, duzma daeggo, duzlawz daxgoeng. Seizneix gyoengqde baenzneix bangfwngz, caen doiq mbouj hwnj lo.

Daihgya gienq de, cijaeu gaenx guhhong, simndei sim soh, baenzlawz yiengh hix mbouj youq-gaenj. Duzdouq ngaekngaek gyauej.

Ndigah, duzdouq couh bienq-baenz gij yiengh ngoenzneix mwngz raen lo.

•Sawcuenhvaez Lwgnyez•

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Daih' it Laj Gofaex-nganx

Mwh gou yaek gyaep hwnj Ah Veij seiz, dingqnyi dahnuengx baez hemq. Gou baez baenq gyauej, couh mbouj raen de lo, de gaenq deng ndoengfaexnganx mwncupcup gwnz bya goemq caez lo. Danghnaeuz liuh ndaej daengz, gou couh mbouj daiq de daeuj lo, hoeng, gou lau daxmeh yaek hozndat.

Gou daengx din roengzdaeuj, daengx ndang hanh conhdwgdwg, caj diemcaw ndaej gaemz heiq ndeu le, cij sing hung heuh de: “Ah Yingh? Ah Yingh?”

Gij sing iqet caemhcai q hojlienx he han gou: “Gobyauh!”

“Mwngz deng sieng lwi?”

“W, mwngz vaiq daeuj.”

“Deng gyawz le?”

“Deng giz ga gou lo.”

Gou ngeix, itdingh dwg de buet baeg le couh laihdai, gou vanzlij laebdaeb buet baenaj. Hoeng saek-laeuq de caen deng sieng, baenzlawz guh?

Vunz gizyawz youq gyawz ne?

Gou raen gij riz gyoengqde youq ndaw ndoeng faexmaknganx byaij. Gyoengqde lumj gij faenz rauq nei cigsoh menhmenh bin coh dingjbya, gij go'nywj baihlaeng gyoengqde cungj deng daemh laemx roengzdaeuj. Aenvih bineix seizcin seizzah fwn

noix, daengz ndawcib ndwen gouj, doenghgij doenghgo beij doenghbaez cungj maj ndaej daemq, caenh raen benq mbawfaex deihdwddwd boep roengz, cingq caj fwn doek.

Doenghgij bo daemqdet haenx, heiqndat lumj langhhaej henjgim nei, itloh foekfan coh gwnz mbwn. Heiqndat ndonj haeuj ndaw rin, gangq dwk gwnznamh, mboujdan doenghgo cungj hawq roz, doihduz hix deng daindat, bouxvunz ndoj youq ndawranz hix oemq ndaej gyauej ngunh caez. Bae daengz suenbyaek mbaet makcej, mwngz couh yawjraen makcej gaenq deng dak hawq, namzgva naengheu youh nyez youh geng. Gij ndit remjcik hawj vunz diemheiq mbouj ndaej, daengx ndang unqnaiq, mbouj miz maz yinxdaeuz bae guhcaemz guh-angq. Bouxhung daengz doengxaemh 6 diemj cung gvaqlaeng cij haengj okdou. Doengxngoenz, gyoengqde cungj ndoj youq ndawranz, cij miz gyoengq dou doenghgij lwgnyez cij gamj daengz gyangbaq bae, youq laj ndit aengfwdfwd buet bae buet dauq.

Dahnuengx gou Ah Yingh gaenq ndaej 6 bi, lumj duz gaeqlwg gwq riengz laeng gaeqmeh nei, cungj maij nem gou.

“Mwngz aeu bae guh maz? Gou hix bae.” De cungj dwg baenzneix gangj.

Meh gou couh ndwn youq henz bang de: “Mwngz baenzlawz guh daeg-

Ndaej Angq Couh Aeu Angq

□ Vangz Gozgvanh / 黄国观

Sai:

Ciuhvunz geijlai gvangq,
Ndaej angq geijlai seiz,
12 ndwen gvaq bei(bi),
Gvaq seiz vaiq dangqmaz.

Mbwk:

Ciuhvunz geijlai gvangq,
Ndaej angq geijlai nanz,
Geijcib bi seizgan,
Miz maz nanz mbouj gvaq?

Sai:

Vanzlij lix couh gwn,
Lij baenz vunz couh angq,
Ngoenzcog bingh haeuj ndang,
Yaek angq aiq yiem gvaiz.

Mbwk:

Vanzlij lix couh gwn,
Lij baenz vunz couh angq,
Saek ngoenz mbouj ndaej gangj,
Yaek angq caemh mbouj ndaej.

Sai:

Vanzlij lix couh gwn,
Lij baenz vunz couh diuq,
Saek ngoenz mbwn mbouj yiuq,
Dawz bae siu baenz daeuh.

Mbwk:

Vanzlij lix couh gwn,
Baenz vunz couh vuenyungz,
Saek ngoenz moek ndaw rungh,
Aeu maz riunyumnyum.

Sai:

Ndaej angq couh aeu angq,
Makvangh gyauej geij cin,
Ngoenzcog dai mbouj ning,
Fouz sing hix fouz ngauez.

Mbwk:

Ndaej angq couh aeu angq,
Ndaej riu couh doq riu,
Ngoenzcog mbwn mbouj yiuq,
Baeq diuqdep bae youz.

beix ne?”

Gou gaenbonj mbouj rox baenz-lawz han, cijndei daiq de caez okrog.

Dauqdaeij cingq doxdax, mbouj miz vunz haengj dingz roengzdaeuj rex de.

“Itcig buet coh bya bae. Mbouj ndaej gvaengz, mbouj ndaej riengz vunz baihlaeng, mbouj ndaej dingz roengzdaeuj. Byawz daengz cei q laeng couh deng fad.” Ah Veij gaenq dingh

ndei gij gveihcwz doxdax, hoeng doiq gou soeng di: “Baenz lo, dahnuengx mwngz iq lai, goj mbouj camgya baez doxdax neix.”

“Gou mbouj iq lone, gou yaek ndaej 7 bi lo.” Dahnuengx mbouj fug, buek naeuz, “Gou hix aeu buet!” Doeklaeng de couh deng laemx lo.

Hojsik, Gou bonjlai z goj ndaej mingz daeuz, seizneix deng Ah Veij ciengj bae lo.

(caengz sat)